

四庫全書

集部

欽定四庫全書

不繫舟漁集卷五目錄

五言律詩

懷友

寄劉仲宣

坐嘆

元日客黃岩懷何汝樵三首

寒食寓興次黃宗魯二首

夢同彭仲愈剡九成會廣化寺

夜半舟發丹陽

家書不至

太湖

遊天香院

醉後在林長卿家戲作

初十夜月

得子

水竹軒

送林景元

竹屋

獨客

城西虎跑寺

悼劉肅王二首

甃井

寫懷

贈章以元昆仲

歲暮客中二首

送陳伯尚使還山東

惠遠寺詠懷

近山樓

送胡希元歸江西

舟發蘭溪

丙午元日

題劉元芳只如是齋

四月十六寓玉環喜家童來住至

病中遣懷五首

乙未歲元日三首

懶拙

入山

過李家坑

覽鏡

閒愁

讀常九成哀詞

立秋後送竹扇與穎達太常

戴元載送野禽以詩酬之

浮生

新歲憶曾子白

贈周元帥

遊雅山寺二首乃吳德大長者所建

孔宜人挽章二首

琴書所

懷崑山諸鄉友六首

題彭氏雲松亭二首

寄竹趣

悼圭姪

懷焦信中

送別



橋上

送益上人

舟中風雨懷邵文伯

送旌德教諭馬彥遠

元日

重登近山樓

題顧文學幽居三首

欽定四庫全書

不繫舟漁集卷五

元 陳高 撰

五言律詩

懷友

作客黃山下思君漢水濱  
愁牽清夜夢吟瘦老夫身  
漂泊誰知我交遊獨此人  
春來尋小艇江上問通津

寄劉仲宣

遙憶劉公子才華孰與俱  
昔時樽屢對此日信全無月

上潮生海樽開雪滿湖客懷應不惡詩筆想頻呼

坐嘆

坐嘆黃昏後愁生白髮新清宵誰共語明月自相親  
江海成何事乾坤謾此身故鄉無信息歸計尚因循

元日客黃岩懷何汝樵三首

令節催我老新年憶汝深江湖同汗漫書問久湮沉  
舊事真如夢何時遂盍簪相知多滿眼孰與細論心  
謾把椒花看慵將竹葉傾親朋各異處天地愧浮生多

士紛冠蓋吾儕尚梗萍太湖春水濶思爾欲西征  
蹤跡同羈旅東西各滯淹為儒生計拙久客僕夫嫌道  
路何時已年華故自添定知相見遠乾鵲不曾占

寒食寓興次黃宗魯二首

浩蕩乾坤大羈棲歲月深他鄉對寒食愁思滿淮陰詩  
句慙孤詠春花孰共尋相逢同郡子時復一論心

去歲清明節天台看杏花淒涼今日事漂泊野人家淮  
楚風塵暗鄉山道路賒倚門親白髮友哺媿林鴉

夢同彭仲愈剡九成會廣化寺

地僻交遊絕情親夢寐通  
盍簪遊古寺呼酒向新豐  
燈火相依語雲萍一笑同  
覺來驚異縣庭樹起秋風

夜半舟發丹陽

舟子貪風順開船夜半行  
天寒四野靜水白大星明  
長鋏歸何日浮萍笑此身  
柁樓眠不穩起坐待雞鳴

家書不至

久望家書至不聞南雁聲  
幾回愁爛漫直欲淚縱橫  
骨

肉三年別鄉闕萬里情且無拘束苦即擬問歸程

太湖

浩淼吞吳會微茫接洞庭流應合萬水勢欲小東溟天  
宇浮空濶風帆入杳冥蛟鼉成窟宅白浪晚吹腥

遊天香院

小徑入深竹幽居出上方開窓山日靜布席午陰涼細  
細雲生石鮮鮮菊繞牆得逢高士語渾與世相忘

醉後在林長卿家戲作

醒時筵秩秩醉後舞傚傚爾汝忘形甚喧譁出語多兒  
童紛笑舞婢僕定嗔呵戒酒從今始親朋永勿過

初十夜月

映水銀梳缺懸空寶鏡分光能凌太白勢却碍行雲出  
沒何時已圓虧自古聞佳人恨離別倚檻泪紛紛

得子

得子雖云晚開懷始自今敢誇萬事足聊慰一生心襁  
褓看渠長箕裘屬望深貧家湯餅具獨有典瑤琴

水竹軒

軒楹如意敞水竹近人幽波影浮蒼雪林光映碧流釣  
魚供客饌護筍引龍遊歲晚投簪笏閑居百不憂

送林景元

雨後驚秋暮江頭送客歸孤舟行遠水烏帽映斜暉到  
屋看黃菊趨庭服彩衣不能隨汝去目斷白雲飛

竹屋

竹屋何年構筠窓四面開簾鋪涼吹集簾捲翠陰來靜



可攤書卷幽宜具酒盃王猷居儘好俗駕幾番回

獨客

獨客悲清夜高秋托異鄉月侵窓影白風度角聲長野  
戰生新鬼邊烽照近疆歸耕吾計決不必問行藏

城西虎跑寺

石勢虎蹲伏山形龍屈盤寺開唐殿閣墳掩宋衣冠幽  
澗泉聲細斜陽塔影寒近城多戰鼓棲息此中安

悼劉肅王二首

死別成終古遊從記昔年才名方綠髮魂魄竟黃泉水  
涸臨池墨堂空坐客羶斯人早凋喪誰與問蒼天  
鶴化歸遼海狐亡首故邱諸兄絲作汨慈母雪盈頭日  
夜川東逝乾坤世若浮小屏山下路風色晚颼颼

甃井

伐山移白石甃井畜清泉冷浸天光碧深通地脉玄  
閘低收繙易圃近灌蔬便亂世謀生理何能慮未然

寫懷

經世慚無策歸田且避喧  
干戈隨地有故舊幾人存  
餌藥扶衰病持盃慰弟昆  
不因來往客終日閉柴門

贈章以元昆仲

相見談經史江樓坐夜闌  
風聲吹屋響燈影照人寒  
俗薄交遊盡時危出處難  
衰年逢二妙亦得悶懷寬

歲暮客中二首

今年五十二客鬢已蕭蕭  
天地孤蓬轉江山萬里遙  
望鄉愁白日懷友夢清宵  
那復同看月論心坐石橋

自嘆飛蓬轉年隨爆竹殘人煙兵後少風雪夜深寒止  
酒愁囊竭思家得信寬牆梅空自好不似故園看

送陳伯尚使還山東

騰喜山東使相逢海上村賢勞行百里勛業活中原地  
入南溟遠星還北極尊別離情黯黯鵬鶚看孤騫

惠遠寺詠懷

古寺夜沉沉殘燈對夜深老僧誰共語客子自成吟霜  
重悲城角風迴亂水禽吳山逢歲晚愁折故鄉心

近山樓

樓居元自好，况復近青山。  
雲氣簾櫳外，松聲几席間。  
倚欄宜雨過，拄笏及朝閒。  
酒興兼詩思，窓扉夜不關。

送胡希元歸江西

落日烏紗帽，西風白布裘。  
吏才兼翰墨，羈旅亦風流。  
聽雨留僧寺，看雲憶故邱。  
他鄉同泛梗，那忍送歸舟。

舟發蘭溪

水送憑風順，舟行不用牽。  
寒林紅自媚，飛鳥白相鮮。  
澗

轉疑無路山開別有天往來今覺老湖海嘆經年

丙午元日

元日居山寺梅花照酒樽病餘玄髮少酒後壯心存天  
地腥膻隔江淮蜂蟻屯誰施洗兵雨吾欲叩天關

題劉元芳只如是齋

萬事只如是百年能幾何乾坤旋磨古蠻觸搆兵多結  
屋依松樹鳴禽在澗阿閑居送日月雲影共婆娑

四月十六寓玉環喜家童來住至

數月思家信今朝喜汝來妻兒憐吾遠懷抱向誰開山  
谷多烽燧田園半草萊大軍消息近故里尚堪回

病中遣懷五首

臥病玄冬半羈棲碧海邊風塵方滿野戎馬已經年下  
邑供軍食何時發漕船薄才無寸補自合賦歸田

亨衢通碧海此日嘆窮途遠愧陶潛達那同甯武愚菊  
英寒不落草色暮全枯愁至思清酒無錢何處沽

貴人乘海舶日日報佳音藩省東南大朝廷倚望深金

樽春螳泛寶劍夜龍吟寵錫來天上寧孤報國心  
生理居官廢空聞祿代耕僕嫌裘褐敝妻笑甌塵生欲  
去乾坤窄無成歲月更故人清要地應解樹勛名  
久臥思登眺扶衰謾倚樓山紅斜日映江白曉煙浮竹  
直書空雁帆歌入浦舟病身慚食祿長羨五湖遊

乙未歲元日三首

元日將堪喜今年賊定平天心占節候人事厭戈兵召  
虎征淮甸周王在鎬京遙思鴛鴦集北闕望馳情



獻歲同諸弟庭闈喜色新  
禮儀隨習俗來往有比鄰  
處世為儒拙還家勝客貧  
去年無棣縣行道憶茲辰

暖氣南州早梅花滿屋簷  
春隨椒酒至雪向鬢毛添  
烽燧今猶警山林未可潛  
平生愛書冊多病亦須拈

懶拙

懶拙從人棄行藏與世違  
陶潛辭米去張翰憶蓴歸  
垂釣貪春水看花愛夕暉  
使須開竹徑還製芟荷衣

入山

入山驚道險上嶺覺天低日礙危峰過雲依翠壁棲幽  
花如血染怪鳥學兒啼避世須來此桃源路已迷

過李家坑

鳥道高千丈雲山入萬重汗流愁赤日力倦倚青松羣  
僕頻相失行人竟不逢人家何處有僧寺隔前峰

覽鏡

覽鏡吾衰矣飛霜入鬢毛乾坤戎馬徧淮海戰塵高性  
僻謀生拙時危涉世勞幽棲無賴甚遣悶強揮毫

閒愁

日日聽春雨閒愁過却春  
亂離書總廢多病藥相親  
溪柳青依竹園花色媚人  
索居無意緒空負物華新

讀常九成哀詞

吏治剛還折人情白易汙  
終憐嘔血死詎免受金誣  
遺事傳南土遊魂返故都  
但令公論定世道尚堪扶

立秋後送竹扇與陳穎達太常

竹扇台州出新看製作  
工織文生翠浪入手起清風  
篋

筭終難棄蒲葵迥不同勿嗔秋後寄暑氣近猶隆

戴元載送野禽以詩酬之

故人專僕至攜贈兩幽禽雖在樊籠裡終懷霄漢心羽  
毛真可愛鼎鑊忍相尋縱爾從鷗鷺前村春水深

浮生

浮生近五十多病老相將諸事今年懶閑居白日長春  
陰連舊臘殺氣滿遐荒何日干戈靜乘槎意不忘

新歲憶曾子白

經月愁聞雨新年苦憶君青華為客久白髮著書勤酒  
共鄰僧飲蔬從野老分何時共登眺整屐待晴雲

贈周元帥

經濟人才重功名伯仲齊驅馳朝上馬感激夜聞雞海  
漕輸燕北王師出陝西橐弓今日有更望撫遺黎

遊雅山寺二首乃吳德大長者所建

野寺春逾靜禪房晚更幽山花將雨落松影共雲流悟  
法知生幻觀身是夢遊池蓮如吐白止酒亦何愁

上方殊勝地長者給孤園掛壁袈裟淨生堦草秀繁樓  
光凝晚照樹色映前村法食干戈際真知象教尊

孔宜人挽章二首

配德神明胄宜家婉婉姿能供蘋藻職早賦栢舟詩令  
子榮王爵臺臣重母儀鸞章來沒後風木有餘悲

孟母機能斷陳姑饌必豐令名今古並貞操雪霜同老  
憶中州遠身悲逝水東海邦封馬鬣松栢起淒風

琴書所

一室清如許琴書樂意長調絃春日靜開卷雨天涼俗  
客那容入機心自覺忘小童偏解事洒掃熱爐香

懷崑山諸鄉友六首

老病成羈旅妻兒總異鄉費文常困乏生計媿農商  
廢書猶著憂深世未康兵戈何處避悵望海雲黃

右陳公潛

先生

襟期曾憶共離別奈愁何作客經年住題詩近日多風

塵經浩蕩歲月嘆蹉跎舊宅青松樹春來施女蘿

右鄭李明

先生

近得吳中信傷懷獨倚樓故人逃野外盜賊滿江頭老

益妻孥累閑尋數澤遊道傍爭按劍明月向誰投

右曹新民

支郎詩法妙林下昔曾親契濶俄經歲光陰似轉輪春

來多冠盜海口漲沙塵錫杖知何處懷思為損神

右莊蒙泉

上人

久報遊江左仍聞入海湄梗萍無畔岸兵馬滿潢池綠

鬚愁應久青雲志豈移越城樓上月別後幾回思

右林伯庸



先生

故人江海上似汝我應憐羈旅風塵際生涯豺虎邊年

華添白髮家業僅青氊親老雙雛小來歸理石田

右林希顏

先生

題彭氏雲松亭二首

亭屋依先壘雲松寄永思昔年翁所好此日志寧虧觸  
石濡春雨千霄長舊枝九泉呼不作感物泪如絲

雲在親曾翫松長手自栽夜臺人去遠華表鶴歸來細

影生青石寒陰護碧苔歲時陳酒食瞻望思徘徊

寄竹趣

五月不見面幾回思寄書艱危人事廢懶拙友朋疎白  
槿開池畔黃梅熟雨餘感時驚久畧何日訪幽居

悼圭姪

圭姪吾猶子溫良幼稚年俯身迎客揖低語近人前駒  
殞空良馬雛傷失彩鸛吾宗衰已甚為汝每潸然

懷焦信中

中山風雨夜憶汝夢頻生燈火憐孤坐詩章孰與評交  
遊都造次春事又清明早晚南歸日相過兩慰情

送別

平生幾兩屐邱壑每窮探訪鶴青田曲穿雲雁蕩南老  
成儕輩服姓氏衆人談相見復相別題詩興不堪

橋上

落日清溪上涼風梓樹秋北來船竟泊南去水空流宇  
宙終無極干戈未肯休野人無意緒獨立數歸鷗

送益上人

一雨新秋爽千山細路遙林泉歸此日天地颯驚飈訪  
鶴穿松樹觀魚俯石橋幽棲輸爾樂高隱肯予招

舟中風雨懷邵文伯

寒雨晚淒淒孤舟出郭西翻風白浪急隨地黑雲低客  
計真漂蕩離懷重悵悵思君那得見開篋玩新題

送旌德教諭馬彥遠

山縣流泉碧鬢宮杏樹青春風看采藻白日坐談經市

酒醅浮蟻湖魚鱠斫鯖官情應不冷覓句想微醒

元日

元日風兼雨蕭條野外村過門車轍遠記節酒盃存戰  
伐看今歲樓遲且故園兵戈如未息身世豈須論

重登近山樓

羈旅歸來日危樓得再登山如前歲好雲向小窓凝種  
木看今長藏書比舊增題詩增感慨我老愧何能

題顧文學幽居三首

幽構郊墟迥清陰竹樹連隔江山近牖遶屋水通船簪  
紱前朝盛詩書世澤綿何年居此地遠自建隆前  
龐老南山隱淵明栗里居紅收闌外果青種舍傍蔬愛  
客頻沽酒辭官獨著書黃塵滿城市來往迹全疎  
齋室東偏闢書窓北向開竹林宜夏簟瓦爵泛春醅難  
弟居同樂鄰翁至不猜吾廬稍迢遞杖履數能來

不繫舟漁集卷五

欽定四庫全書

不繫舟漁集卷六目錄

五言排律

丁酉歲述懷一百韻

題周氏二代碑銘

讀茂林徐處士墓銘賦十韻

同諸友遊宴豐山

閱故同年吳善鄉書悲傷賦十二韻



桃源春曉

欽定四庫全書

不繫舟漁集卷六

元 陳高 撰

五言排律

丁酉歲述懷一百韻

屯蹇悲吾道蕭條客異鄉  
謀疎多忤俗性直遂逢殃  
鷙鳥纏羅網翹材受斧斨  
世無知己者誰識此心臧  
悵望天同遠憂來水共長  
百年千變態一日九迴腸  
憶昔年華壯居貧學業荒  
讀書慙老大操筆欲顛僵  
發憤光陰

逝研思寢食忘雨天燈火夜冬曉鬢毛霜書字蠅頭綴  
歌詩玉韻鏘心懷冰蘖苦佩結茝蘭芳兔笑株傍守蛙  
憐井底藏拂衣迷道路仗劍遠遊方景趣多佳麗江湖  
信渺茫吳甌秋浪白淮楚暮雲黃野寺金鋪屋樓船錦  
繫檣臺荒麋引子邱瞑虎成行瞻眺窮幽勝交遊得俊  
良跡雖萍梗泛名藉藻詞揚古道槐花發清秋桂子香  
梯高雲路迥殿廣月華涼進逐英髦俊躋攀翰墨場偶  
然收鄙野亦得步康莊上國春光早明時帝運昌皇居

城萬雉禁苑柳千章對策披閭闔陳忠補袞裳臚傳天  
咫尺鵬化海汪洋玉陛聯班序瓊林被寵光花簪紅映  
帽酒賜綠浮觴草色沾零露葵心映太陽委心從此始  
憂國未渠央造化功深厚雲霄志激昂初非縻好爵亦  
足慰高堂奉使為民牧宣威到海旁鄮鄉傳載籍藩閩  
重金湯江抱孤城轉山含遠樹蒼天高連太白日出上  
扶桑土俗何多訟編氓半是商由來難撫字况復際勛  
勩早出星當戶宵迴月滿牆勤勞非敢憚倚杖最難量

僧舍屯戈甲田家出糗糧但聞施釜楚不顧乏糟糠南  
北修途梗滄溟巨艦航貴人紛往返終歲費迎將分省  
官曹盛行臺紀律張聯翩驄馬至絡繹使車煌孰問瘡  
痍苦惟耽燕樂槍幽花籠綺席疎柳媚紅妝下筯萬錢  
費揮金一笑償珍珠兼水陸容冶陋姬姜風靡瞻儀表  
波頽缺禮防近人跳鼠獺當道舞豺狼爭詫堆金塢寧  
聞返衆牀紛紛慕羶蟻衮衮轉丸蜣讒構蠅棲棘吞圖  
雀捕蝗負荆廉藺遠刎頸耳餘猖清白甘飢餓輕肥恣

陸梁滑稽吾獨拙  
枘鑿衆胥戕鯨困  
遭螻蟻鴟翔逐鳳  
凰無聊悵憾憾欲  
去瞽倮倮公冶羈  
磨魯靈均放逐湘  
一身奚足恤萬事  
總堪傷粵自羣克  
起于今七載強釁  
端萌汝穎滋蔓匪  
荆襄處處蜂屯盛  
時時豕突狂食人  
肝作脯掠野犬驅  
牂霧翳車塵暗雷  
轟礮石磅絳巾明  
爍火白骨積崇岡  
天狗昏騰啄攬搶  
曉吐芒黍田荒出  
草蒿樹大如楊天  
府惟吳會王州說  
建康粟儲供海漕  
栢列凜臺網陷沒  
俄相繼分崩遂莫  
當重臣誰抗節方

伯罕勤王將帥推門闕謀謨出廟廊捷音空陸續賊勢  
愈跳踉夜靜吹笳急霜寒擊鼓鏜徒羹黔首肉詎斧赤  
眉吮險嘆連城失全憐壯士亡關河天漠漠江漢水湯  
湯海卒乘文鷁苗軍跨驪驪立功期克復畜銳尚彷徨  
疾養終成痼醫招不療瘍民生遂塗炭衆冽浸苞稂厄  
運丁陽九何時見一匡淳龐懷吳項揖讓想虞唐俛仰  
窮今昔謳吟發慨慷乾坤旋磨古歲月逝波忙露白寒  
蛩泣秋高客雁翔盛時愁易集邈世困何妨駿足悲槽

樞珍禽謝稻粱塞翁徒失馬臧穀總亡羊脫畧千鈞重  
消磨百鍊剛悶憑詩暫遣病倚藥頻嘗閑散思投紱韜  
潛貴括囊陶公能委運梅尉蚤知彰故土多薇蕨春江  
有鯉魴歸與理簑笠從此釣滄浪

題周氏二代碑銘

藉甚周康惠才猷衆所欽致身居顯要愛國秉忠忱介  
特猶山立騫騰肯陸沉鑿磯江失險破械獄無淫岐麥  
人人頌甘棠處處陰揚名光父祖承訓守規箴諸老朝



章異推恩帝澤深追封榮二代報本遂初心彤管書勛  
業豐碑照古今慶延瓜瓞遠有子繼徽音

讀茂林徐處士墓銘賦十韻

處士邑之彥典刑人所宗立身當弱齒護母犯鋸鋒平  
糴濟飢色推財無靳容彭聃懷向慕嵇阮樂遊從生達  
契玄理死期知令終龍湫千丈瀑玉甌萬尋峰幽覽成  
陳迹清遊悵舊踪逝川何日返玄室白雲封考德觀賢  
子鐫銘對古松歌詩續哀誄鳴咽和淙淙

同諸友遊宴豐山

至正戊子春正月七日甲辰永嘉陳高與黃巖商尚  
敬施謙訪朱君伯賢于臨海之鳳嶼越翼日乙巳伯  
賢與其季伯良持酒俎邀予登豐山時黃君順德章  
君子皓陳君大章欣然從遊已而陳師聖張子材偕  
弟子溫亦至遂相與上絕頂望巨海還飲浮圖寺席  
既撤復舉盞松樹間酒酣因賦二十八韻

新歲多幽興清遊出縣城故人留欸曲好友復逢迎整

屐當清曉登山寄遠情嵐光寒不起樹色寂無聲徙倚  
巖邊憩逶迤谷底行路蹊窮屈折峰頂上崢嶸俛瞰滄  
溟濶渾疑地軸傾天光連浩淼海氣變陰晴沙鳥雙雙  
白風帆葉葉輕波瀾看浩蕩島嶼見分明宇宙真無極  
虛浮嘆此生似堪扳若木可擬即蓬瀛眺望移時立稽  
留半月程那知身是客但覺思逾清古寺藏深竹禪窓  
蔭白檉倦依林樾坐靜聽鼓鐘鳴高論窮千古彈棋謾  
一枰旋呼茶滿椀贖出酒盈甕珍重開華席頻煩勸咒

觥嘉蔬烹筍韭異味雜螺螳浩飲俱勍敵  
沉酣及老成  
狂吟驚虎豹至樂謝竿笙忽返青林興  
其如白日征扶  
攜重舉盞真率遂班荆自笑何為者  
空傳漫浪名梗萍  
慙獨客冠蓋動羣英勝賞真堪紀  
高懷孰與并明朝歸  
北郭回首暮雲平

閱故同年吳善鄉書悲傷賦十二韻


命殞艱危日人推節義雄志期吞逆賊變忽起狂童鳳  
殪梟羣底麟傷獸穿中乾坤含怒色日月耿孤忠萬里

長城壞東風保障空血藏應化碧柱立未鑄銅恨滿江  
湖水悲生草木風三軍空縞素鄰郡遂巾紅憶昨蟾宮  
步曾追驥足同死生成永訣交道嘆今窮魚腹緘題在  
銀鈎畫字工忍將秋雨淚洒向剡溪東

桃源春曉

武陵源上景自古閔幽遐風物圖中見煙雲洞口遮藍  
堆山色近練捲瀑流斜露菌莖莖碧春桃樹樹花丹砂  
昇曉日紅錦散川霞野老衣冠古何人殿宇華漁郎迷

舊路塵世隔仙家榮辱槐根螳紛爭草底蝸蓬萊環弱  
水商嶺渺黃沙此地如堪覓孤舟便欲拏



不繫舟漁集卷六

欽定四庫全書

集部

不繫舟漁集卷七

七至九

詳校官編修<sub>臣</sub>范來宗

中書<sub>臣</sub>劉源溥覆勘

覆校官中書<sub>臣</sub>朱鈐

校對官助教<sub>臣</sub>胡予襄

謄錄貢生<sub>臣</sub>孔繼峯



欽定四庫全書

不繫舟漁集卷七目錄

七言律詩

丁亥冬感懷時聞雲南有擾

客黃山三首

送王公毅清流尉

桐江舟中

送鄭汝玉歸莆闕

懷賈陵州

送孔子克赴戊子會試

正旦

次易剛中韻二首

落日

易剛中來訪

元日括溪舟中

雲松巢為曾東白賦

江亭獨坐圖

甲午歲濱州道中

三月十三日錢成夫壽旦諸公會飲城南文秀

園

羈思十首次謝純然韻

懷信州彭仲愈

桃山小港

寄題葉氏皆山樓

寄亨元峰

辛丑元日

詠雪三首

寄陳彥卿

寄顧仲明教授

題中峰樓

贈陳性初

寄高晦叔兼簡衍道源

送馮升伯航海歸

獨坐

挽許茲父處士

贈醫士陳宗正

送陳與公入京

題聚禽圖

濯足秋風圖

謝戴文瓚僉院惠草帽

遊林家園

遊靈山寺

東林院在陳家塋

送孔正夫赴會試

趙氏祖墓大樟木

黃河

自明回溫留寓郡城不得遂歸田之願述懷有

作

幽居晚興就簡榮子仁都事

寓鹿城東山下

庚子歲元日

立春

過青華山訪曾子白不值留宿僧舍

冬日夜夢中得句因續成之

劉山驛

題白鶴寺瀑布

客南塘作四首

和陳君從中中秋對月二首

楊建德名其居曰竹泉求予賦



欽定四庫全書

不繫舟漁集卷七

元 陳高 撰

七言律詩

丁亥冬感懷時聞雲南有擾

溪上梅開花可憐  
看花祇欲卧溪邊  
非關景物他鄉異  
自是愁思觸處牽  
南鄙冠戎當此日  
中原饑饉已連年  
吾徒漂轉成何事  
只合滄江買釣船

客黃山三首

自到黃山十餘日終日飽飯只昏昏誰家搗練不停杵  
俗吏抱書長在門天寒鴻雁滿南國歲晚梅花開故園  
客裏謾將詩慰藉遣懷不用酒盈樽

山高冬曉不見日海近晴天多出雲何處魚蝦爭到市  
小溪鵝鴨自成羣農家政苦征租急縣吏還聞出郭勤  
獨坐幽窓生百感風前落葉更紛紛

正憐山頭雲霧微俄復細雨下霏霏他鄉作客經時久  
滄江買船何日歸堂上愁親髻髮白天末故人音信稀

似聞西橋風景好擬將愁眼看鷗飛

送王公毅清流尉

琅邪之山繞郡青清風千古醉翁亭故人作尉殊不惡  
寇盜於今況已寧畫舫入淮乘夜月凋弓行道見秋星  
到官尚想多幽興白日金鞍掛玉瓶

桐江舟中

桐江昨夜春雨作孤舟灘上風力強老夫船頭看山色  
何人烟際歌滄浪紅桃幾樹開照水白鳥一雙飛過檣

作客天涯恰三載深憑景物送還鄉

送鄭汝玉歸莆闕

莆闕深入海東南日出先看曙色酣  
李愿歸耕盤谷土杜陵思樂百花潭  
到家三月山礬白入饌千林竹筍甘  
愧我天涯尚羈旅鄉愁因爾不能堪

懷賈陵州

淒然作客海東頭幾度登山憶賈侯  
在昔文章蒙許可祇今詩句費賡酬  
五湖春水村村長三月吳花樹樹幽

遙憶畫船頻載酒此身那得伴清遊

送孔子克赴戊子會試

先師之後悉賢良今子秋闈復擅場  
騰喜飛騰同大阮更憐文采繼元方  
天高金闕星辰動春暖瓊杯雨露香  
尚想東風得意日宮花斜插照林觴

正旦

正旦每年長作客今年新歲得還家  
鄉閭禮數生疎甚故舊過從笑語譁  
椒酒懽來尊屢盡菜盤醉後味偏嘉

南州土暖春光早怪見紅桃滿樹花

次易剛中韻二首

腰帶多因病裏寬晨興無賴俯流湍轉蓬獨客空滄海  
折桂羣公在廣寒白酒可令終日醉青山那似故鄉看  
期君共買雙溪艇高掛風帆上碧灘

年年湖海歌長鋏渺渺乾坤寄此身近到荒村經數月  
得逢佳士作比鄰東風齊落花千樹涼夜新年月半輪  
策杖好來同煮茗題詩何用苦懷人

落日

秋郊慘淡落日微西風蕭蕭吹客衣殘霞紅葉自相映  
獨鶴孤鴻何處歸中州塵暗鼓鼙急滄海恨高舟楫稀  
回首東山月未上怪看星影弄輝輝

易剛中來訪

一月過門無好客故人底事到茆齋相看萍梗悲華髮  
共語干戈感客懷籬菊有花堪對酒盤餐無物旋煎鮓  
情真正擬留君宿童僕催歸忽滿堦

元日括溪舟中

元日舟中眠復坐盪槳下灘多北風椒花栢葉負佳節  
紗帽布衣隨短篷溪山可人空滿眼歲月催我恐成翁  
臘底還家今未到新年思溪情最濃

雲松巢為曾東白賦

雲松深處何人住東白先生結構幽可但巢居同太古  
祇疑仙隱是丹邱涼生牖戶濃陰合氣潤琴書曙色浮  
不有歸來雙白鶴月明誰得伴清秋



江亭獨坐圖

老翁獨坐江上亭，遠山近山青復青。  
白波東流天渺渺，碧樹自古天冥冥。  
目送飛雲渡水去，嘯引神蛟出穴聽。  
此意世人誰到得，除是謫仙初酒醒。

甲午歲濱州道中

驅車北行值新歲，濱州城西官道長。  
遠山殘雪映日白，曠野飛沙如霧黃。  
身世百年徒汗漫，頭顱四十愈踈狂。  
已判今夕到無棣，爛把酒盃澆客腸。

三月十三日錢成夫壽旦諸公會飲城南文秀

園

城南園館小橋東柳色青青花樹紅此日杯盤追勝事  
一時冠蓋集羣公美姬舞罷歌金縷醉客歸遲並玉驄  
莫遣春光空老去明朝歡會更須同

羈思十首次謝純然韻

雪風吹帽髮全枯多病兼愁懶步趨身寄他鄉年又盡  
吟看衰草日將晡故園消息沉天表舊日交游隔海隅

祇有濁醪堪遣興擬從鄰舍典羅襦

山骨倚天霜落後湖光沃日雨晴初何緣碧樹千尋起  
誰遣流波萬頃潞眺望豈無佳景致羈棲不似舊閭閻  
草堂憶在清溪曲竹裏幽窓可讀書

夜中見月渾忘寐曉起看山祇獨吟那得文章垂不朽  
已知衰老故相侵天寒大澤龍蛇蟄歲晚荒郊雨雪深  
有客可人吾邑子往來時得一開襟

客居無事日從容只有傷心似酒濃金馬玉堂成寂寞

田翁漁子慣迎逢坐看同輩聲名起羞見諸生禮數恭  
淮北近傳兵甲滿且須歸去撫孤松

晚來濯足向清湍遠客無朋總不懽彈鋏高歌還自笑  
開樽一醉未能拚散材豈必同樗櫟薄俗誰令愛菰蘭  
父老相逢情更惡為言租稅未輸官

盛世賢才皆進用野人漂泊更何悲無由省闈聯鴛序  
且向江湖食肉糜劉向重登天祿閣荀公再入鳳凰池  
腐儒只解談今古豈有功名勒鼎彝

淮西盜賊成羣起攻奪城池殺害多保障誰能為尹鐸  
折衝未見有廉頗南來羽檄時時急北向官軍日日過  
賈誼治安空有策九重深遠欲如何

落木飛鴻冬月暮短衣烏帽五湖濱思親夜夜生歸夢  
作客年年笑此身犬吠競猜南越雪鶯啼未聽上林春  
世間誰是知音者青眼相看只故人

遙憐雁蕩天台秀雨過羣峰翠黛凝崖瀑高懸千丈雪  
洞門深積萬年冰幾回夢想題詩到何日歸來拄杖登

擬拉仙人酌仙酒醉看明日海東升

漢朝儒雅江都相唐代文章吏部郎萬古斯人如日月  
祇今餘子但膏粱蕭條自恨生予晚追逐何由到汝旁  
俯仰乾坤一長嘯不知身世在他鄉

懷信州彭仲愈

盜賊攻破信州城傳聞殺戮及孩嬰故人經年無信息  
此時無地避刀兵風雨每驚鄉夢短鶯花偏喚客愁生  
蘭溪船上看紅葉長憶同歸載酒行

桃山小港

江流深入亂山堆，山隨江轉勢縈迴。  
天雨天晴龍出沒，潮落潮生舟往來。  
遙看縹緲雲烟起，疑是神仙洞府開。  
豺虎縱橫不可到，行盡水源空復回。

寄題葉氏皆山樓

聞道居家樓絕奇，青山重疊開罍窰。  
嵐氣能令窓几濕，日光映出樹林遲。  
二月三月雨晴後，千峰萬峰雲起時。  
想見登臨足幽賞，倚欄留客共題詩。

寄亨元峰

見說元峰亦有年，墨名儒行最堪憐。  
山中到老應長健，筆下能文非浪傳。  
習隱徑存陶令菊，尋盟社結遠公蓮。  
何時釋我塵纓縛，來伴閒雲聽說禪。

辛丑元日

新年覽鏡白髮多，老將至矣可奈何。  
雲霄飛騰無壯志，山林懶拙抱沉疴。  
江西江東地流血，村北村南人荷戈。  
生逢此世有何樂，屠蘇飲罷強高歌。



詠雪三首

連年臘月不見雪今日開門對雪山  
滕六飛花自天上  
仙翁種玉滿人間  
淮西戰士無消息  
剡曲扁舟誰往還  
試看梅花故無恙  
且將濁酒破愁顏

積雪徑自白未消  
紛紛又見六花飄  
野蠶繭熟堆千頃  
雲鶴毛輕散九霄  
草屋曉來寒凜冽  
江村歲暮景蕭條  
題詩最苦無佳句  
那得騎驢過灞橋

昨夜苦寒不可當  
曉起雪浸三尺強  
江上光搖瓊玉樹

空中碎剪白霓裳征夫賈客廢行路草舍席門愁絕糧  
來歲農穰預可卜吾儕猶及見時康

寄陳彥卿

樓屋遊山東海頭翠雲影落小窓幽登臨昔日同諸彥  
羈旅經年憶舊遊故國鶯花春入夢滄江風雨夜生愁  
不堪老去悲離別歲月無情如水流

寄顧仲明教授

長憶青華翠色寒北窓對酒幾同看鼎煎浦口鱸魚白

盤簇簷頭樹果丹來往正期娛晚景亂離俄嘆失清歡  
故園回首江山異落日閩南獨倚闌

題中峰樓

中峰之樓風景幽山花滿屋翠雲流海天日出蓬萊近  
月夜烟清沆瀣浮溪上松陰歸曉鶴簷前花樹語春鳩  
齊州渺渺黃塵裏此日登臨是勝遊

贈陳性初

髯朱別後正作惡忽見吾宗喜欲狂他人何如同姓好

流俗多緣聲利忙道義交游追古昔文章品藻出尋常  
青雲期爾飛騰早館閣諸公鬢已蒼

寄高晦叔兼簡衍道源

每憶西齋竹色深東風新筍想成林一春彈鋏梁溪上  
何日移船漢水陰高子平生偏愛客衍公於我最知心  
相期白首交情在歲晚鷗盟可重尋

送馮升伯航海歸

江頭木落晚蕭蕭送客滄江萬里潮過海青天纔咫尺

開帆白雁共飄飄故鄉霜後魚蝦熟十月山中贖粟饒  
思爾到家無限樂歲寒清隱可能招

獨坐

獨坐東南日向晡風高雪盡雁行孤青山天際連於越  
白水秋來滿太湖海內干戈猶爛漫舍間園圃近荒蕪  
文章未必能經世深愧飄蓬歲月徂

挽許茲父處士

豺虎縱橫滿故丘少微星殞避旄頭骨仙生托旌陽夢

羽化今從長史遊池上鳳悲春雨黑松間鶴去暮雲愁  
誅文賴有燕公筆解使清名身後留

贈醫士陳宗正

吾宗雅愛北山居几上常攤素問書橘葉秋香浮石井  
杏林春綠滿庭除宋清楚券誰能似扁鵲回生信不虛  
海內即今成痼疾問名醫國計何如

送陳興公入京

掾郎文采吾宗彥泛舸之京意氣雄碧海五更看北斗

錦帆六月掛南風  
九天宮闕祥雲合  
萬國車書此日同  
看汝飛騰方綠髮  
烟蓑應笑白頭翁

題聚禽圖

幽禽無數雜雌雄  
畫筆能追造化工  
白鷺彩鴛洲渚上  
班鳩錦雉樹林中  
雙雙上下飛相逐  
箇箇分明態不同  
安得小亭依綠水  
朱欄盡日倚東風

濯足秋風圖

千峰翠影落孤舟  
高人濯足滄江流  
遠天光動玻璃碧

西風水落瀟湘秋渺渺乾坤大瀛海悠悠今古一浮漚  
崑崙玄圃在何處從此乘風萬里遊

謝戴文瓚僉院惠草帽

細結夫須染色新使君持贈意偏真玉川便易煎茶帽  
元亮還拋漉酒巾影墮水波浮晚照黑遮霜髻隔秋塵  
深慚欲報無瓊玖感戴寧忘拂拭頻

遊靈山寺

舊聞海上有神山今見樓臺島嶼間鰲背千年開佛國



鯨波十里隔人寰  
風吹僧影浮杯渡  
雲送龍身聽法還  
避世擬從支遁隱  
塵簪吾已久投閒

東林院在陳家塋

佛子神功世莫殫  
空中擁地作峰巒  
貝宮萬疊金銀爛  
琪樹千章紫翠盤  
白日風雷生樹底  
青天化雨散雲端  
何當伴我烟霞隙  
一榻寧辭野閣寒

送孔夫正赴會試

冬日江頭梅蕊新  
鹿鳴歌輟送嘉賓  
把文南省已驚俗

對策明堂定絕倫  
桐樹朝陽鳴彩鳳  
桃花春浪化金鱗  
高堂白髮俱強健  
早聽芝泥出紫宸

趙氏祖墓大樟木

翠拂蒼穹藹綠烟  
地靈一氣萃山川  
孤枝直聳三千尺  
奕葉曾經幾百年  
詩禮培根資伯仲  
衣冠席蔭續曾玄  
三槐門巷應相似  
何似君家慶澤綿

黃河

河流九折自崑崙  
海內川渠此水尊  
勢走東南無日夜

聲喧雷雨動乾坤禹功曾鑿三門險漢使寧窮萬里源  
千古英雄爭戰處舟人指點尚能言

自明回溫留寓郡城不得遂歸田之願述懷有  
作

西風落葉送清秋力疾凭欄寄遠愁正慕陶潛歸栗里  
翻為王粲客荊州山峰近郭東西起江水通潮日夜流  
景物年年只依舊獨憐白髮鬢邊稠

幽居晚興就簡榮子仁都事

花間疎雨夕陽明竹外幽堂夏氣清  
飢鼠窺人緣石走小禽啄食下堦行  
哦詩不惜生華髮把酒真堪慰客情  
從事擬尋邱壑勝也須騎馬出江城

寓鹿城東山下

大隱從來居市城幽棲借得草堂清  
鳥啼花雨疎疎落鹿卧巖雲細細生  
石眼汲泉煎翠茗竹根鋤土種黃精  
艱危隨處安生理何必青門學邵平

庚子歲元日

曉風吹雨漏聲殘野徑青泥濕不乾  
椒酒聊從新歲飲  
梅花猶似去年看  
生逢兵革空流涕  
老向田園已掛冠  
遙望金門天萬里  
羣公獻納在雲端

立春

前日愁看人日雨  
今朝喜見立春晴  
土牛鞭動驅寒氣  
玉燭調和想太平  
片片雪梅窗外落  
絲絲白髮鏡中生  
年來貧病添衰老  
節物關心負酒觥

過青華山訪曾子白不值留宿僧舍

青華山根紫石洞僧家結構林泉幽為憶看書坐白日  
相從策杖來清秋烟霞滿目共誰賞猿鶴有情邀客留  
尚擬書燈對今夕逢君煮茗話離愁

冬日夜夢中得句因續成之

今日冬至陽始回客中無賴廢持杯乾坤萬里風塵滿  
南北何時道路開白髮頻添隨繡線壯心都冷類葭灰  
中興早看雲臺築老去何妨卧草萊

劉山驛

馮公嶺頭樹可數劉山驛前花正開白日同行如夢寐  
長年作客暫歸來生涯漫倚青藜杖羈思都憑濁酒杯  
野店老翁驚再至自憐不是棄繻才

題白鶴寺瀑布

白鶴寺前看瀑布丹霞洞口坐莓苔千古萬古流不盡  
前山後山何處來風吹散作晴天雨客夢幾聞半夜雷  
我欲挽歸霄漢上徧令六合洗塵埃

客南塘作四首

亂離作客最間關  
目送歸鴻老淚潛  
咫尺家鄉成異域  
朝昏烽火映前山  
學仙無路遊三島  
避地何時到百蠻  
獨立風前梳短髮  
懶將明鏡照衰顏

春來日日起西風  
吹送浮雲過海東  
花落名園芳草滿  
燕歸華屋故巢空  
陶潛解印閒居久  
王粲登樓作賦工  
舊日交遊多白首  
時時相見慰途窮

雨霽南塘春水多  
日光浮動綠生波  
風前無數蜻蜓舞  
柳底成羣白鷺過  
垂釣老翁真可畫  
盪舟女子最能歌



眼看景物渾依舊飄泊風塵奈老何

江頭無計問歸舟抱病羈棲古寺幽風雨鶯花成寂寞  
干戈詩酒廢賡酬衰年白日愁邊度故國青山夢裏遊  
見說王師向淮甸早須傳檄定南州

和陳君從中中秋對月二首

海風吹月上江頭碧落沉沉白露秋對酒何人開綺席  
題詩有客在江樓一天星斗光全沒萬古山河影不收  
極目南溟仙島近乘槎欲放釣鰲鉤

每恨中秋對月難  
天時人事總堪歎  
幾年愁向他鄉見  
此夜欣逢故里看  
光射玉龍鱗甲動  
影翻翠鳥羽毛寒  
已拚醉倒金樽側  
百歲光陰若逝湍

楊建德名其居曰竹泉求予賦

綠竹流泉帶草廬  
眼中得此稱幽居  
荷筇移屨清無比  
開徑穿渠計未疎  
書帙翻風驚翠羽  
釣絲牽雨出文魚  
棲遲自得邱園樂  
不羨人間駟馬車

不繫舟漁集卷七

欽定四庫全書

不繫舟漁集卷八目錄

五言絕句

思親詞

送興童都事還京三首

題畫二首

己亥四月十九夜夢中作二首

題畫四首

題水仙花圖

訪楊汝楮遇其飲醉不相見

題丹邱生柯敬仲竹木

趙子昂折枝竹

絕句二首

雁字

紅葉

題王景畧捫虱圖

禽名詩

藥名詩

六言絕句

贈諸葛東山

欽定四庫全書

卷八目錄

欽定四庫全書

不繫舟漁集卷八

元 陳高 撰

五言絕句

思親詞

淚滴東甌水思親欲見難  
水流終有盡兒淚幾時乾

送興童都事還京三首

家臨東海住身共白雲間  
不為瀛洲客終年不出山  
出山連日雨送客大江潮  
天際開晴色雲帆去影遙

日照離筵酒風吹去客舟不如東海水相送到神州

題畫二首

烟樹高低綠春山遠近青僧歸雲外寺客坐水邊亭  
曉嶂青螺起晴雲白練舒林間茅屋小髣髴似吾廬

己亥四月十九夜夢中作二首

芳草隔平地碧雲生遠天空將舊時泪洒向落花前  
烏鵲鳴嘉樹椒花泛瓦尊雙親堂上坐執爵有諸孫

題畫四首



小園桃與李春日競繁華石上幽蘭樹秋來自作花  
茅舍雪初消幽窓夜方靜美人期不來月照梅花影  
愁來生白髮問爾復何愁應被春光惱多情雪滿頭  
芳草綠淨姿開花媚長夏蛺蝶自飛來豈是忘憂者

題水仙花圖

草木凋零盡風霜送歲華湘江寒夜月獨照水仙花  
訪楊汝搢遇其飲醉不相見

為愛楊雄宅攜琴暮往來草玄人醉卧惆悵把琴回

題丹邱生柯敬仲竹木

雲烟連紫閣風雨暗丹邱仙客今何在淒涼竹樹秋

趙子昂折枝竹

帝子啼痕濕湘江暮雨寒絕憐樵采後留得一枝看

絕句二首

地濕泉流礎庭虛石卧雲井欄行小蟻蛛網掛飛蚊  
雲合虹腰斷風迴雨脚斜淺灘屯宿鷺高樹競棲鴉

雁字

勢折成千點行開見八分書空有底恨落日映迴文

紅葉

片片染秋霜枝枝映夕陽縱饒紅勝錦只是惱愁腸

題王景畧捫虱圖

頭岸烏紗帽身穿白布衫英雄如不遇捫虱對誰談

禽名詩

遊子歸心切提壺看落鴻告天天不語愁殺白頭翁

藥名詩

丈夫懷遠志兒女苦參商過海防風浪何當歸故鄉

六言絕句

贈諸葛東山

丞相名傳萬古遠孫學足三餘試問東山高卧何似南陽草廬

不繫舟漁集卷八

欽定四庫全書

不繫舟漁集卷九目錄

七言絕句

送章好德還京二首

題松菜圖

赤城春曉圖

清港渡

題獻後猗圖

戊子元日客中有感二首

題花竹翎毛四首

題梅花二首

東坡遊赤壁圖

題畫

白蓮圖

溪山秋意圖

題戴悅齋兄弟墨蹟

王子猷訪戴圖

即事漫題十首

烟江疊嶂圖

八月十六夜憶何汝樵林希顏追思往事悵然

傷懷二首

貞婦祠五首

題螭

子昂圖

秋雨四首

棘上雙禽

劉景玉贈蕙花口占絕句謝之

景玉和韻來覓荷花復成二絕送花與之

贈星士陳光大三首

題水仙

送牛德大二首

蘆溝曉月圖



翎毛

陶隱君畫像

李息齋竹

覓熏香

己巳元日客中二首

久雨二首

藏春亭四首

春日送別

題顧仲華扇就送之京

題明妃圖

題畫

欽定四庫全書

不繫舟漁集卷九

元 陳高 撰

七言絕句

送章好德還京二首

海青大影落波間  
使者樓船六月還  
水底蛟龍眠不起  
順風打鼓過成山

北望燕山倚舵樓  
水程十日到通州  
宸居縹緲青霄上  
閭闔門開拜冕旒

題菰菜圖

栗里園荒舊日歸  
手栽菰菜雨根肥  
只今客裏看圖畫  
惆悵紅塵滿目飛

赤城春曉圖

曉日霞光映赤城  
瓊臺天近碧雲生  
世間車馬紛如螳  
誰聽仙人弄玉笙

清港渡

清港磯頭坐夕陽  
蕭蕭隻影寄他鄉  
天邊不盡青山色

若比羈愁愁更長

題獻後猊圖

西域後猊百獸豪  
照人閃閃紫金毛  
當年入貢來疏勒  
誰向明堂諷旅獒

戊子元日客中有感二首

慈烏繞樹聲啞啞  
新年見汝更思家  
弟妹堂前稱壽酒  
吾身漂泊海天涯

生平若有文章癖  
老大仍悲歲月增  
館閣祇今招隱逸

吾曹何日見飛騰

題花竹翎毛四首

棠梨三月吐花齊  
布穀飛來樹上啼  
想見小園微雨過  
春光都在石欄西

梨花沐雨帶嬌羞  
獨立枝間一鳥幽  
若遣美人初睡起  
定應無處著春愁

秋林物色晚淒淒  
寒雀飛來棘上棲  
最愛石根青竹好  
天空不見鳳凰啼

乾坤寥落歲將闌  
竹葉梅花獨好看  
可惜幽禽棲不穩  
霜風日暮羽毛寒

題梅花二首

夜宿羅浮酒半酣  
霓裳夢裏舞毵毵  
覺來月在梅花樹  
無限清愁落海南

西湖載酒負幽期  
想見梅花似舊時  
曾憶倚窓清夜看  
雪晴月照過牆枝

東坡遊赤壁圖

石壁懸空樹影枯江船載月鶴鳴孤須知蘇子登臨地  
不是英雄戰鬪墟

題畫

夕陽凝紫滿秋山松下茅亭只數間獨棹小舟溪上去  
何人得似老翁閒

白蓮圖

佳人翠袖玉為容淪落清波恨最濃千載香魂消不得  
至今化作白芙蓉



溪山秋意圖

古木槎牙夕照間  
蕭蕭秋意滿溪山  
東風擬覓玄真子  
不見漁舟繫石灣

題戴悅齋兄弟墨蹟

戴家伯仲舊知名  
聞道臨池筆意精  
今日曉窓看墨蹟  
風流髣髴見平生

王子猷訪戴圖

月照清溪雪滿山  
孤舟乘興只空還  
一時來往同兒戲

底事流傳滿世間

卽事漫題十首

日日四山黃霧昏時時戰鼓響江村愁看春色隨流水  
那得開懷對至尊

年年花發可憐春今年見花愁殺人不是風光近來別  
祇緣兵戰此時頻

連年築寨向山中曉起俄看野火紅三百壯夫同日死  
千家居室一時空

老翁憶子哭聲哀婦怨征夫去不回前日山中新戰死  
昨宵夢裏見歸來

悍吏登門橫索錢人家供給正憂煎官糧須借三年後  
軍食尤居兩稅先

農父江邊立荷戈無人南畝種嘉禾今年妻子愁飢死  
活到明年更奈何

竝海居人不種田捕魚換米度經年釣船漁網都狼藉  
老穉流離哭向天

將軍披甲氣如霓猛士搦戈命若絲高坐談兵真莫敵  
前驅戰死竟誰知

江海波濤日日生山林豺虎復縱橫老夫僻在深村住  
恰似春蠶繭裏行

兵革相尋餘十年十人九死一生全近聞關陝王師出  
何日南來掃瘴烟

烟江疊嶂圖

烟波十里楚天長疊嶂青青入渺茫江上漁舟原不繫

祇應招我釣滄浪

八月十六夜憶何汝樵林希顏追思往事悵然

傷懷二首

月滿空堦獨自行  
思君偏動舊時情  
少年相見今頭白  
幾度中秋看月明

昔年曾憶夜相過  
共賞清光對酒歌  
天上月明還似舊  
故人分散奈愁何

貞婦祠五首

處之麗水葉氏女嫁為潘家婦處陷葉氏歸家從父  
母居白巘砦中與弟婦王氏以死自誓賊至王先自  
經死葉與其妾新葵相隨投火酒甕中甕破因投崖  
下死鄉人為立祠焉

白巘山砦白雲根剪紙那招節婦魂澗水流乾崖石爛  
精靈終古在乾坤

女子歸寧婦有夫妾知事主肯逃遁葉家一旦三人死  
貞烈同門絕世無

玉質追隨捐絕壁悲風蕭瑟起長杉舊傳古嶧青楓嶺  
今見高溪白石巘

紅巾攻破處州城多少男兒入虜營何似婦人能守節  
千年英氣死如生

白石山頭貞婦祠鄉人時節薦香粢憑誰收入春秋筆  
節義堪為後世師

題螭

昔年作客到淮陽飽食霜螯一尺長幾度秋風橙子熟

樽前空對菊花香

子昂圖

風動秋山日已晡  
舊時林苑盡荒蕪  
王孫去國猶無恙  
解寫江南竹樹圖

秋雨四首

九月以來天色晴  
一朝風雨悶還生  
客鄉白苧那禁冷  
滄海歸舟未可行

牆邊黃菊開正好  
曉來雨過盡離披  
客裏寧悲秋色老



遙憐打損故園枝

雨脚黃昏萬點齊  
只愁入夜更棲棲  
家書可忍題燈下  
歸夢那能到屋西

老親憶子海城邊  
舍弟思兄風雨前  
秋水夜來添一丈  
括溪應望下灘船

棘上雙禽

幽禽並立羽毛齊  
日落風寒棘樹低  
擬待洛陽春色好  
牡丹枝上伴鶯啼

劉景玉贈蕙花口占絕句謝之

故人曉剪盤中蕙，遣致雙枝几案前。  
祇恐鼻根勾引慣，朝朝準擬送新鮮。

景玉和韻來覓荷花復成二絕送花與之

荷花花落蓮房在，不似蘭蕙殞風前。  
謾遣數朶供玩賞，深憐佳實倍芳鮮。

覓花仍許為開筵，瓶罐應簪置席間。  
但得雙樽浮綠蟻，不須多品競紅鮮。

贈星士陳光大三首

有客布衣紗帽烏相逢華髮更清癯曾聞厯卜青雲士  
他日還應到我無

愛汝讀書不作吏少年蹉跎今老成日日開簾肆中坐  
高談禍福使人驚

底用贏糧去遠遊只將奇術動公侯京都春色濃如酒  
三月鶯花滿御溝

題水仙

深冬霜雪送年華野草全枯木作芽  
賴有小園春意在新開無數水仙花

送牛德大二首

送別都門酒半酣綠楊芳草憶江南  
故鄉聞道風塵起欲寄家書不忍函

四月西湖景最奇使臣行役到家時  
畫船載酒輕輕蕩紅袖籠笙細細吹

蘆溝曉月圖

蘆溝橋西車馬多山頭白日照青波  
蘆亦有江南婦愁聽金人出塞歌

翎毛

幽鳥毛翎也自奇竹邊孤樹立多時祇今何處無羅網  
落日空郊慎所之

陶隱君畫像

註就神農本草文高風欲繼大茅君羽衣不受人間聘  
句曲山中多白雲

李息齋竹

薊邱墨蹟重今時一尺琅玕價不貲想見小窓秋雨後  
酒醒貌得過牆枝

覓熏香

君家自造熏香品絕似番禺船下來謾遣小詩從汝乞  
已溫微燼待人回

己巳元日客中二首

去年新歲客東甌今歲新年閩海頭北望家山三百里

南風何日送歸舟

老鬢慵梳添白髮客樽強飲對新年  
此身那似山中鶴  
夜夜歸樓碧樹巔

久雨二首

新年新雨連殘臘一月渾無一日晴  
曉起鶯聲都寂寞  
寒深柳眼未分明

春來殺氣連天地海內民生寄甲兵  
獨客倚欄愁更老  
隔牆時聽午雞鳴

藏春亭四首

倚闌祇見四山青  
竹外牆扉盡日扃  
絕愛園林風景好  
韶華都在水邊亭

亭前花木滿園栽  
李白桃紅樹樹開  
春色惱人渾欲醉  
雙雙飛蝶過牆來

細聽流鶯宛轉歌  
對花不飲奈春何  
日斜醉卧堦前草  
不覺沾衣柳絮多

好花園裏四時開  
誰道春光去復來  
但得玉壺頻送酒



不妨日日共銜盃

春日送別

昨日相逢今日離  
東風回首日遲遲  
春深應有梅花在  
別後何妨寄一枝

題顧仲華扇就送之京

好向山中草屋幽  
曉涼隨意到溪流  
憑君為問金臺客  
何似漁翁不繫舟

題明妃圖

明妃出嫁離長安撥盡琵琶悲遠天自是生為延壽誤  
至今死後畫圖傳

題畫

華蓋羣峰雁蕩南夕陽雨過碧於藍秋風八月涼堪倚  
拄杖穿雲看石楠

不繫舟漁集卷九